

湘綺樓書牘卷二目錄

長沙湘潭王闓運壬父著

張香濤六啟

曾竹林一啟

吳清卿三啟

鄧辛眉二啟

彭申甫二啟

李雨蒼二啟

向子振一啟

維桂亭二啟

卞頌成一啟

李漢春一啟

黎蕤齋一啟

楊吉南一啟

郭玉池五啟

家報八啟

湘綺樓書牘卷三目錄

長沙湘潭王闓運壬父著

張楚珩一啟
李申夫一啟
黃翰仙一啟
彭川東一啟
耿鶴峰一啟
張壽樵一啟
李勣堂一啟
游子岱二啟
席研香一啟
周雲昆一啟
張粵卿一啟
鐘蘊菴二啟

黎簡堂二啟

崧錫侯一啟

尊經院生一啟

馬伯楷一啟

錢徐山一啟

李幼梅一啟

上外舅一啟

朱肯夫一啟

趙搗叔一啟

嚴鴈峰一啟

唐鄂生二啟

曹鏡初一啟

陳魯詹一啟

左錫九一啟

孫伯璵一啟

黃燿庭一啟

張子澣一啟

高伯足一啟

黃運儀一啟

勞鷺卿一啟

陳用階一啟

鹿滋軒一啟

殷竹伍一啟

張叔平一啟

黃小岱一啟

李若農一啟

潘鄭盦一啟

唐藝農一啟

湘綺樓書牘卷二

長沙湘潭王闓運壬父著

致張尙書

興平重入。暮氣昏黃。披霧相逢。乃遣之子。機雲至洛。利見張華。今之薄游。誠爲不負。但新歡初洽。別日已催。割恨而行。良因復種。在途十夕。兩夢清揚。以此推之。相尋有日。飛仙以愛著之故。而不復行空。石隱之情。復思游宦。不能不微恨斯人也。闓運九州求友。月旦方人。英彥之材。誠爲多有。然多濡習俗。但見目前。宏達疏通。殆難其選。以此自負。不後時賢。常微恨天性未醅。愚忠難及。徒欲自適。無益橫流。竊冀英豪。必資通識。天下將治。固非俗吏悍卒所可參耳。孝達居文儒之任。試宏獎之權。時望歸宗。材藝自足。又嘗側聞緒論。猶拘名教。出身徇物。非子而誰。傾企之懷。固非儂以文采風流。相爲期許而已。盜賊夷狄。無道不成。道寄於人。人依於學。今亂已二紀。事變萬端。洪苗法英。殆同乞匄。當事者以其支柱而自謂功名。亦可笑也。誠達於政。興復何難。執事當官而行。必能建樹。求賢之雅。亦足感人。但過用精神。以妨寢食。小損大害。宜且留心。清談廢事。亦爲往習。伏願審此二者。以圖遠大。九流輔治。儒術尤蕪。今

襲其名而實用名法。名法之敝。非但鞅斯。烈烈而亡。奄奄而盡。其實一也。暇亦宜博覽管墨。以佐大猷。闔運歸於衡陽。復期十載。相去日遠。心意時通。恐或遺忘。未能致問。無以空谷而不嗣音。舟行多暇。先此申意。

乖違九秋。中通兩訊。皆未得手復。未知誰浮沈也。今歲在蜀。曾因敖金甫致聲。兼有婚姻之議。亦竟未得敖書。京都官忙。懶相并。此例自久。然時聞聲欬。未爲疏闊。尊經築舍。諸生大盛。復得門下領選。搜巖采蘭。極稱得士。天不欲踵鄂中之敝。所謂有志者事竟成也。闔運於乙亥。卽得薛興文致聘。恐懼慚惶。雖極思一奉光儀。猶慮自書黃紙。旋知兩錢主講。五經斯立。又得稗公五書。約來一覲。中無臯比之議。是以敢作峽游。及至乃復見羈扳。貿然入院。名輕學淺。果見推排。勢不可已。與相搪突。幸諸生相諒。因愛忘憎。荏苒經年。吁其危矣。離家既遠。舍已芸人。又復翩然志於出峽。竊念仁兄當始終其事。以副初心。魏闕雖榮。名山亦樂。何必遠期尙侍。坐度年華。且名實雖隆。眞傳未顯。駸駸日老。逐逐仍勞。似宜暫去承明。來遊石室。五年之後。聲學俱成。重入修門。未爲晚也。高材難得。虛譽無憑。以今日之地望。當無敢爲君勸學者。非闔運不能發此言。其以爲賈生耶。汲黯耶。計領嫂雙飛。懿親歡聚。生徒喜慰。自遠然驥。

此間歲奉三千。差厚於監錢六百。亦使閩運得藉依聲價。相與切磋。是所願也。非敢望也。委曲已畧告竹簣編修。餘意更令諸生面啟。先此致懇。伏希深察。正孺當已西邁。若在京尙求致念。蜀士英妙。儻守而教之。定軼卿雲。開山之功。不減五丁。閩運實緣湘中有切已之事。未能久駐。明春水滿。必戒歸舟。臨箋拳拳。無任欽遲。霜寒歲近。珍攝興居。

前歲因胡縣丞奉一箋。詞意詳盡。其人阻事不出。因未呈鑒。鈔呈則無可取。重寄又無可言。因此闕然。非敢不修民敬也。然明公臨州。詢訪幽隱。亦宜有一介之使。責於空園。殆類士元所云。君臣俱失者矣。側聞宏開工作。大啟學堂。愚者料其難成。俗吏以爲不急。乃鄧保之則云。前在南海。規模閎遠。後來蒙業。猶可富強。彼儒者之言。若是。信聽遠之多不聞也。既非夙昔。所以相期。故亦不能獻議。民從甥曾紀元孝子之孫。勞臣之子。文章爾正。博涉多通。似是向上之材。而頗趨時尚。言及開採。每爲扼腕。公之所作。彼獨慕焉。以爲無階自通。不然何減法正。其指陳鐵政。動輒千言。利敝朗然。若有可覈。閩運無以知也。然每恨明公之無助。竊憤衆論之腹非。今有人焉。自甘驅策。又其材地。足可特升。何庸不介一言。令公知之。但薦士之書。今成禽憤。挾函懷

刺。雅士不爲。紀元久望旌麾。閩運恥其私謁。雖曾薦之於江督。頗獨阻其鄂游。今聞其已至武昌。因復肅函。令其晉謁。明公試一召見。扣其兩端。或冀聞所未聞。異乎千諾。新春延慶。伏想安和。無任縣遲。

瞻雲西笑。每欲夏游。留滯因循。又復春暮。論者以爲蜀帥求退。就熟當遷。天府雄藩。不必兼圻爲大。果爾當齎錢出送也。雪琴墓銘。前歲已將求丹筆。材官咨且。恐不能賜許。今之能者。復有何人。李謹翁沈皆不肖其任俠。謹鈔稿呈覽。改正後幸爲書之。奉格紙兩幅。或偶有誤字。別書於後。如嫌太小。即求飭侍書更紙別畫。以成華寶。來使羅都尉。亦名家孫子。其父伯宜太常。早有名字。想所知聞。羅生孤露失學。又疏弓馬。然粗知吟詠。未墜家風。如蒙收置鈴轅。齒於騎吏。則翩翩文采。爲出色材官。或憐念忠儒。俾其家食。乞飭寮吏。傳諭南鹽釐吏局一減薪。廣半俸所不足。若能俾近衡州。使得就學。尤爲私願。專此上瀆。無任悚企。

二紀睽違。兩宵談讌。還舟迅邁。八月抵家。近想勤劬。但有永歎。然江南部署。已冠劉李。鰕島微蟲。未能送死。從容造膝。亮有其時。新歲延禧。綏福爲頌。前話乾館之餒。尙未盡詞。愚中人心。尤甚水火。士農棄業。唯事鑽營。計敝州釐鹽二局。歲糜五萬金。卅

年來幾二百萬矣。而湘人不富。游惰日滋。純實之風。蕩然已盡。且專就鹽政言之。商運原不須督銷。督銷尤無須分局。其始由於曾侯欲調劑一二窮乏。遂至全歸勢家。漸及京官親族。至於督府僕婢姨媼。又其小小者也。鹽商浮冒五六十萬金。許薛阿稍欲理之。鹽幕陳姓納賄三千。許道反被撒差。非沅浦固不能有此奇政。實亦根株盤互。不可得理。今譚生告終。事可更始。公遂能廓清之耶。湘人之福也。若猶欲循常更替。則必如志道其人者。稍去兼并。頗振孤寒。或不失設局之本意。蓋此差初以位置湘人。漸以位置湘官。漸爲江南道員一差。漸爲湘人官江南者二等美差。本原既差。何能綜覈。虛費金穀。不感憲恩。甚無謂也。此差又有幫辦一人。例以舉人充之。李相曾欲見委。閩運對曰。公不笑訝。則捧檄矣。今有姻家彭主事。江督外孫。名父之子。父子五舉。不免飢枵。其性直戇。嫌怨者衆。王祭酒等力能絕其生路。無所告訴。敢干明公。試一垂詢。必紛然斥短。攷其劣迹。乃一無徵。如魏武用人。必蒙首選。今非敢謂其能破除積習。仰助鴻綱。特以私恩同之請託。閩運資格境地。本應乾館之條。偶一干求。知當笑許。其或大風吹垢。一洗凡空。悉罷諸差。爲風俗人心之計。則清源正本。又何求焉。因論一事。故不多及。

去臘恩恩告還。未復通候。旋讀謝表。具仰訐謨。晉使偶來。略聞初政。望風解綬之效。既著於下車。指擬安定之功。無勞於動色。儒術匡濟。久闕其人。大用大效。海內傾企。側伏湘壘。所爲神王也。閩運濫居祭酒。實愧素餐。經義猶蕪。祝予已慟。次子稍有涉識。道卒夔州。緣此悼心。遂還終隱。近爲寫定春秋例表。又祭法喪服箋。更治禮經。稍尋微緒。然心煩意瞽。俗狀紛然。前歲有書勸台端以宏遠。今茲併章句而自疏。吁其蔑矣。山西近日循吏推龍皞臣。文苑則董研秋。此二人者。不遇明公。菴從物外。未審史館徵傳。能與甄揚否。善化賀仲純以通判候補。幸隸鈴下。此人名父之子。操守有餘。頗習律條。蒙委權局。儻可試之別駕。雖未敢云展驥。要之原本有自。必大異捐保諸班。因其中道奇窮。改京就外。隨衆碌碌。自同瓦礫。又依倚芝葆。恐疑官派。故遠爲說薦。以待鑒衡。不然則舉錯隨宜。人材易見。無俟野人道地耳。大政遠略。非簡牘所陳。故不多及。專頌台安。

與曾甥

竹林賢甥侍福。朱洲小泊。適得順風。因遂揚帆。乃聞見訪。惜不少句留也。來書未明。示不知何故上省。致未更問。昨復專使。乃知有志鐵政。且欲鄂游。是一策也。去年已

達甥名於峴公。乃事正辦鐵政。已成罷議。張公強自支持。當此時局。用彼群纖。何能有成。亦何須真成。不過開銷銀錢而已。甥言謬也。然書尾所云。妄人則吉之言。一語破的。甥姑妄干之。吾姑妄言之。必須預備川資。安排火食。此二者不可妄也。先請謄錄。尙欠三千錢。吾許爲甥還之。去年恩恩忘付。甥可告三兒。令還清此不可妄。論語家本初成。便以借人。乃三兒之妄。所著墨子未成書。體亦多未盡。吾已看一過。留在家中。其原本當還我。此等皆宜鄭重者。而今解人不易也。豈西法不重付託耶。張公性情無定。記識不精。要是可與言之人。但僕僕干求。則彼此無益。吾書極爲斟酌。可遣人送去。得其傳見。恐須帶被窩坐官廳也。彼好排場。喜奉承。有馬士英之風。又非尋常名士之比。甥自揣摩可矣。

致吳撫臺

清卿先生節下。卅年前曾李亟譽高名。無緣一見。前歲連橋夕渡。邂逅旌麾。思即停車。以成傾蓋。霜寒風勁。車殆馬煩。北轍南轅。復同勞燕。然相知有數。令問無遐。特欲使區區。昭於識察耳。豹岑去後。孝達孤危。聞極能降心。同其伊任。此實朝廷之福。但友朋直諒。政貴當官。操縱之間。亦云多術。澳門一事。似聞節下及孝達頗復如滌公。

天津時委咎中樞。則何貴乎智勇矣。海內吏治久頌。民風不靖。先求自治。必能被以廉風。巖處傾聽。敢效一得。敝縣生員郭見安。丁穉公幕客也。自負嶸崎。願爲時用。曾干彭李。皆阻閣人。今復踰領謁張。不假介紹。孝達愛憎難測。恐其訑訑。閩運與節下向未通書。不嫌請屬。要皆古人恒有之事。儻其大困。希有以資之。至於材藝功能。大臣之所素審。無俟野人請託也。專此達意。敬頌台安。惟照不宣。

頻觀清光。實開蒙塞。地嚴政勩。未獲究詢。承示圖攷。退而私忖。輒以所學。微加暢訓。但恐尺簡未合所訂。龍門在遠。請益猶賒。先寫呈覽。尙冀誨所不合。期於大通。無嫌往復。以衷聖義也。門人郭生私淑字說。推闡主帝。頗有發明。屬其寫呈所作。以爲雉嫔。如可觀采。希進教之。郭生久客諸侯。頻遭試黜。前謁游領表。曾與一箋。令叩崇階。自以所業未成。懼同游客。懷書未達。致閩運十年前仰攀之意。亦鬱而未聞。今之求知。仍前意也。而志趣可嘉矣。舍戚丁百川道良。不工自謀。妄冀脂膏。棄實缺而求優署。誠爲失計。去年與書責之。猶復不信。今困守兩歲。負累巨千。前求鈞託藩使。久猶未效。夫銓衡訓成天使事也。務乞徑飭回任。則公私兩濟。亦使羣吏各安其職。非敢私請。庶佐遠猷。閩運專研三禮。多所未喻。欲求公與督部特開禮局。以兩省經學書

院之費。及弟子見員合治三經。成王正孺纂集之志。緣迫科場。人心無定。俟秋後當上條呈。專肅敏安。無任想企。

前寄一詩。未奉還和。軍書旁午。乃應所題。頗聞壯往之心。屈於入朝之論。曾滌公飽諳爲客之苦。王威甯載詠灰忍之章。遙望旌門。未陪羸亥。朔風邊草。悵望如何。武岡鄧知府輔綿。今年在籍辦團。計禽盜首。爲州官所擄。甚爲怏怏。因明公移鎮。乃欲自明。兼曾佐黔軍。久任邊缺。習勞耐苦。操守堅貞。不遇憲知。猶從常調。倘蒙拔擢。令備前麾。於湘軍亦爲通氣。非黃左曾陳之文采。亦必不可少之蟲官。用敢薦呈。伏惟昭錄。闔運平生志願。滿腹經綸。一不得申。每嗟感遇。所差勝者。不爲指目。聊可倘佯。明公蘊積必申。會當光顯。伏冀堅其志慮。無隨俗推移。親履行間。必確知船堅礮利之不足畏。他日並機器船廠一切裁之。乃後知經術之不誣矣。曾文正徒欲阿時。以求避事。致此紛紜。中興諸公。不能不受咎也。其他何責焉。偶感遭逢。輒發狂瞽。昧妄爲罪。

致鄧親家

幸眉九兄先生親家道席。二月初得手書。歡若對面。寄示新詩。高華猶昔。而風格彌

道復似壬乙歲刻燭分題時。尤有齒宿意新之歎耳。舟中課讀之暇。先和兩篇。文意粗疏。恐不足賡揚清唱。計此時彌兄又已至省。家園春興。獨讓阿龍。未審復有娛園詞句否。三峽躍過。正兄少年本色。闔運垂垂五十。壯心自喜。得君言差爲神旺。此來携巫山之半雲。將九雛之十翼。乃如道士肉重。思借大鵬。又不堪飛仙一笑也。時局日變。肅黨連帥兩湖。左伯癡肥。聲言出塞。曾侯統絳。遽畀全權。南人爲相。誠非美事。本在閒冷。坐視舉棋。一二年間。即還耕讀。再爲卜鄰偕隱之計。蜀中民胞。不可振興。三數文人。或當成業。爲此重往料理。非有所樂也。汎舟始至夷陵。明當入峽。江清月缺。夜起作書。敬頌全福。

秋期盛集。日企清塵。賢子來。得手書。乃知養道深居。殊無游興。及觀大著。心醉目營。四海比鄰。又爽然也。孝達欽遲高名。託誠羔雁。越行甚易。胡不往從。豈聞彼乖厓託之憚羨。或云天行見異。將俟來年。闔運頃爲長李所邀。亦當北邁。豫與君約。如兩家子有與計偕者。便俱率領入京。籍此將雛成其比翼。發皇耳目。開拓心胸。且自陶情。何須坐老乎。河不南徙。政自東傳。頗引新機。洵訝且樂。否則蒲編斑管。日作生涯。揭曉之後。再有續報。祝融之警。兆應旅人。或亦其祥耶。使還頗促。故不多及。專頌雙祺。

不具

致彭親家

正月一牋。六月乃達。可見湘蜀之阻。循誦復書。慨然有志於本朝經學之編。闔運舊亦聞緒論。而以爲知言但矣。經書須有師承。自通志堂之集爲世所訾。阮集出而又變本以加厲。矯枉而過直。今欲求諸老生能發明師說之書。杳不可覩。唯小學有佳者耳。豈得爲鴻編鉅製耶。大著易集說近之。猶嫌有去取。闔運將俟弟子有特達者。各治一經。皆以集解體爲之。非十年不能辦。孤身在蜀。舍已芸人。又無此心緒。田光所爲發慨於銷亡也。吾湘校經堂生。或能及此。故欲辭歸爲識塗之馬。又恐羅研丈以白簡從事。崔貞史於戲臺相見。郭意臣以去就要君。則敗興矣。昨與丁公言。天地閉。賢人隱。聖人作。萬物覩。聖則吾不能。賢則未敢自謝。當今之時。非獨總督非隱。主講亦豈可爲隱。歸與歸與。老糠可然。不必吹藁。今年若不成行。明春定當還里。比日武闡事忙。尙未與主人相見。明年關聘已緩之矣。封翁而謀衣食。未之前聞。俟還時當借箸畫策也。

去歲聞辭講席。不入城府。即欲入山奉訪。人事恩恩。忽又三時。旋值冬沴乖宜。傷慈